

2. Traktandum Jahresberichte 2020/2021

Abstimmzettel siehe separates gelbes Blatt

Zwüjahresbricht 2020 u 2021

Ds Vereinsjahr im 2020 het agfange mit em Kurs Büm u Strücher schnidä. Die Froue u Manne wo dert mitgmacht hi, si sehr überrascht gsi wie tüf dasme darf zrug schnide, dass es öppis schöns drus wird. Es sigi sehr e lerriche Kurs gsi.

Füre Handleteringkurs het sech e toui Gruppe vo 42 Froue agmäudet. Drei Kürs si drus gmacht worde. Am 10. März 2020 het der erscht Kurs im Chiuchgminsrum statt gfunge. Leider isch du när aues angersch worde. Der Coronavirus het üs zwunge, d'Aktivität z' verschiebe oder abzäge. Im November 2021 isch du jede Handleteringkurs mit Begeischerig, Früd u tou Üebe abgchlosse worde.

Öppis gfröits hi mir i dere spetzieue Zyt glich o dörfe mache. E Bluemestruss isch am Bieri Rösi, Hirschi Rösi u am Hadorn Rösi zum 95ische, am Gfeller Vreni u er Wüthrich Frieda zum 90ische gschächt worde. Es het grad nün Ehremitglieder im Verein gä wo ihres 75ische Jubiläum hi dörfe fiere. O sie si mitäma Bluemestruss beschächt worde. (Egli Emmi, Gerber Rösi, Hirschi Margrit, Spring Rösi, Zürcher Vreni, Aegerter Trudi, Feuz Anni, Gerber Annemarie u Gerber Lina).

Im Oktober hets im Schangnou u Bumbach Papiersammusteue gä, wo i dene zwü Jahr mit 30 Tonnä u 20 Kilo, e Riese bärg Papier gsamlet isch worde.

Der Pousemiuchtag im November isch es heileit für d'Chindergärteler, Schüeler u Lehrer gsi. I üsne zwüne Schuelhüser wird d'Ovomutine, d'Weggli u d'Schoggistängeli vom Froueverein vertiut, mit grosser Früd u Dankbarkeit wird es gschetzt vode Ching u Lehrer.

D'Wiehnachtsbescherig im 2020 hi mir o chli angersch müesse gstaute. Statt es Bsüechli, hi mir e Läbchueche mitem Name drufe, unes Chärtli mit besinnliche Wort de Pangsionierte ab 80i dörfe vor d'Hustüre bringe oder mi hets i Briefchaschte ta. Bi Tiune isch am Chlousetag der Samichlous verbi u hets ihne persönlech übergä.

Im 2021 ir Advändszyt hi mir bi 81 Persone ume äs Bsüechli gmacht u es Gschänkli dörfe bringe. Das isch e schöni Ufgab u bringt mängs interessants Gspräch mit sech. E Wiehnachtsbsuech hi d'Annamarie u Barbara o bide Lismerroue im Pfarrhus dörfe mache. Si hi ihne e Cherze mitbrunge. E grossi Früd hi si gha wo z'Lusi us Indonesien via Videoaruf telefoniert het. Da isch d'Überraschig komplett gsi.

D'Senioreässe mit Jasse, Spiele u Brichte, wi o der Lismernamittag wo d'Froue Lismä u öppe chli plöiderle enang guet tüe zuelose u si sich dörfe fröie ufenes feins Zabe. Bim Mukiturne wo die Chlinschte mit ihrne Mütterere ihres Kunschtwärk bim Turne dörfe vorziege u früd ha dranne. Das aues isch je nach Situation düregfühert worde.

Der Grillkurs isch doch du no z stang cho. Mmmh, isch das e gmüetleche feine Abe gsi. Sehr idrücklech vom Aperero bis zum Dessär isch aues ufem Grill zuebereitet worde.

Füre Bättag 2021 si di feine Düft vom vordere Bumbach dür d'Luft gfloge. Ändlech hi mir der Backwareverchuf im Chemmeribode ume dörfe dürefühere. Bi nassem chaute hu du Wätter isch üse Tisch mit dene feine Sache gäge Abe doch no lär worde.

Der Maibummel wo im 2020 vorgeseh isch gsi, isch du e gmüetlechi Rundwanderig mit Brätlä, Jasse u Spiele im Sörenberg im Herbst 2021 gmacht worde.

Zum Schluss danke ig aune rächt härzlech wo öppis bitreit hi am Froueverein! Sehr es grosses Dankeschön de Vorstandsfroue für öii Mithiuf, Zämearbit u Geduld!!

Wünsche Öich aune gueti Gsundhit u vieu Gfröits.

Liebi Grüess

Christine Reber